



Headline: Manipulasi mainan scammer

Language: Malay

Publication/Portal: Berita Harian

Section: Komen

Date: 28 October 2020

Page: 11

# Manipulasi mainan scammer

**Tular** di media sosial beberapa video rakaman perbualan antara scammer dengan bakal mangsa, tetapi 'mujurlah' akhirnya tiada sesiapa menjadi mangsa scammer.

Sebaliknya wujud perbualan antara kedua-dua pihak dan apa yang menarik ialah justifikasi diberikan scammer.

Scammer memaklumkan lebih kurang begini, 'kalau tak ada duit haram, tak perlu rasa gentar dan takut.' Selain itu, 'kami hanya menyasarkan mangsa yang memang terbabit dengan duit haram,' lantas orang yang dapat duit dengan cara menipu wajar menjadi mangsa penipuan.

Ada satu lagi justifikasi bunyinya lebih kurang begini, 'kami buat kerja ini sebab pemimpin kami pun terbabit duit haram.'

Penyataan sebegini mirip dengan falsafah etika teleologi berfahaman utilitarianisme diasaskan Jeremy Bentham (1748 - 1832) dan John Stuart Mill (1806 - 1873).

Teleologi ialah falsafah etika Barat, selain deontologi, hak asasi manusia dan *golden rule*. Teleologi hasil gabungan dua kalimat Yunani, telos bermaksud akhir dan tujuan serta logos bermakna perkataan atau boleh juga dimaksudkan sebagai pengetahuan serta kajian.

Aliran teleologi utilitarianisme ini mahukan segala tindakan dibuat perlu membawa kepada kebahagiaan dan kegirangan golongan majoriti.

*The greatest happiness of the greatest number is the foundation of morals and legislation.* Demikian catatan Bentham dalam *Introduction to the Principles of Morals and Legislation* yang mula diterbitkan pada 1907.

Prinsip ini terdedah kepada manipulasi seolah-olah tiada salahnya ingkar peraturan, yang penting dapat memberikan 'kebahagiaan'.

Soalnya, apakah Macau Scam dapat memberikan kebahagiaan kepada ramai pihak dengan alasan mereka terbabit wang haram wajar 'dihukum'?

Berdasarkan siri laporan mangsa kepada pihak polis, kebanyakan mereka kehilangan duit simpanan bertahun-tahun, termasuk seorang mangsa di Miri yang kerugian lebih RM1 juta.

Pada 2019, ada 2,466 kes Macau Scam direkodkan dengan jumlah kerugian RM121 juta membabitkan 866 tangkapan. Pada tahun ini sehingga Ogos lalu, 1,738 kes Macau Scam direkodkan dengan jumlah kerugian RM128 juta membabitkan 734 tangkapan.

Ternyata, COVID-19 sedikit pun tidak menjarakkan kes Macau Scam dengan rakyat. Selangor, Kuala Lumpur dan Johor menduduki tempat teratas yang paling banyak mengalami kerugian akibat Macau Scam terancang ini.

Warga Kuala Lumpur sahaja mengalami rugi sehingga RM573 juta akibat diperdaya sindiket penipuan Macau Scam dan love scam sepanjang 2019.

Membuat justifikasi merompak harta perompak ala prinsip menghalalkan cara bertentangan semua ajaran agama.

Ini turut menyalahi fitrah manusia apabila dengan sewenangnyanya mengaut keuntungan di atas kealpaan dan kesusaraan orang lain.

Ternyata aktiviti ini mampu memberikan 'kebahagiaan' kepada scammer, namun apakah erti kebahagiaan apabila saban hari 'disumpah' mereka yang teraniaya dan dizalimi?

Kerjaya halal sepatutnya menjadi pilihan, bukan sekadar mengelak diri daripada didakwa dan dipenjara, bahkan ia suruhan agama serta menepati nilai universal.

Negara ini yang berasaskan prinsip Rukun Negara menolak prinsip 'matlamat menghalalkan cara' seperti ditulis Nicolo Machiavelli dalam bukunya, *The Prince*.

Kerjaya membabitkan wang haram seperti menerusi Macau Scam, love scam, rasuah dan pecah amanah memungkinkannya doa tidak diterima Tuhan.

**Penulis adalah** Pensyarah Kanan  
Fakulti Sains dan Kemanusiaan (FSSH)  
Universiti Teknologi Malaysia



Zulkifli  
Khair

